

UNIT


4

KEDAULATAN NEGARA DICABAR



Sinopsis

Zaman penjajahan perlu dipelajari untuk mengetahui sejarah negara dengan lebih mendalam. Campur tangan dan penjajahan kuasa asing membawa banyak perubahan terhadap negara kita. Unit ini membincangkan maksud naungan, campur tangan dan penjajahan, senarai kuasa asing, faktor kedatangan serta kesan campur tangan dan penjajahan di negara kita.



NILAI TERAS SIVIK

Bertanggungjawab



Apakah yang akan anda pelajari?

1. Istilah naungan, campur tangan dan penjajahan.
2. Kuasa asing yang campur tangan dan menjajah di negara kita.
3. Faktor kedatangan kuasa asing ke negara kita.
4. Kesan campur tangan dan penjajahan kuasa asing terhadap pentadbiran, sosial dan ekonomi.



Asas Kemahiran Pemikiran Sejarah

1. Memahami kronologi sejarah kedatangan kuasa asing ke negara kita.
2. Meneroka bukti kedatangan kuasa asing ke negara kita.
3. Melihat sebab dan akibat daripada kedatangan kuasa asing ke negara kita.



(Sumber: Arkib Negara Malaysia dan Kompleks Sejarah Pasir Salak)



Kuasa Asing di Tanah Airku

Negara kita pernah dijajah dan diduduki oleh beberapa kuasa asing pada suatu ketika dahulu. Kuasa asing berminat dengan negara kita kerana mempunyai kedudukan geografi yang strategik dan kekayaan hasil bumi serta sumber alam. Kuasa asing menggunakan beberapa strategi seperti naungan, campur tangan dan penjajahan untuk mencapai matlamat masing-masing.

Naungan

- ★ Naungan bermaksud perlindungan yang diberikan oleh kuasa asing kepada sesebuah wilayah atau negeri.
- ★ Negeri naungan menghantar **ufti** sebagai tanda persahabatan dan menjamin keselamatan.
- ★ Perlis, Kedah, Kelantan dan Terengganu ialah negeri naungan Siam sehingga awal abad ke-20.



TAHUKAH ANDA?

Bunga Mas dihantar sebagai ufti kepada pemerintah Siam setiap tiga tahun.



Cepat Jawab

Nyatakan negeri naungan Siam sehingga awal abad ke-20.



Replika Bunga Mas.
(Sumber: Muzium Kota Kayang, Perlis)

Glosari

Ufti: Pemberian berbentuk wang, bunga mas dan persalinan oleh negara kecil kepada kuasa besar sebagai tanda mengakui kekuasaannya.

Bunga Mas: Sepohon pokok bunga yang diperbuat daripada emas dan perak.

Campur Tangan

- ★ Campur tangan bermaksud kuasa asing mencampuri hal ehwal pentadbiran negeri secara langsung.
- ★ Residen British dilantik untuk membantu pemerintah tempatan mengurus pentadbiran.
- ★ Campur tangan di Tanah Melayu bermula di Perak oleh British melalui Perjanjian Pangkor pada tahun 1874.

Penjajahan

- ★ Penjajahan bermaksud kuasa asing menjadikan sesebuah negeri sebagai wilayah taklukan.
- ★ Kuasa asing menguasai dan mengawal negeri taklukan untuk kepentingan politik, ekonomi dan sosial.
- ★ Penjajahan pertama oleh Portugis di Melaka, James Brooke di Sarawak dan North Borneo Chartered Company atau Syarikat Borneo Utara British (SBUB) di Sabah.


Nyatakan tiga cara untuk mengelakkan campur tangan kuasa asing.

Kedaulatan negara tergugat akibat campur tangan dan penjajahan kuasa asing. Banyak perubahan dilakukan oleh kuasa asing untuk kepentingan mereka.

AKTIVITI PAK-21

Peta Pemikiran (Thinking Map)

1. Berdasarkan maklumat berkaitan dengan naungan, campur tangan dan penjajahan, lengkapkan Peta Pokok (Tree Map) di sebelah.
2. Salin peta tersebut dalam buku latihan anda.





Campur Tangan dan Penjajahan Kuasa Asing

Negara kita telah didatangi oleh kuasa asing yang bertujuan untuk campur tangan dan menjajah. Kuasa-kuasa asing tersebut ialah Siam, Portugis, Belanda, British, Jepun, keluarga Brooke dan Syarikat Borneo Utara British.

Siam

- * Siam menaungi Kedah, Perlis, Kelantan dan Terengganu.
- * Siam menghadapi masalah untuk mentadbir negeri-negeri tersebut.
- * Pada tahun 1909, semua negeri tersebut diserahkan kepada British melalui Perjanjian Bangkok.



Kota Kuala Kedah.

(Sumber: Koleksi peribadi Timothy Tye)



Kota A Famosa di Melaka.

(Sumber: Koleksi peribadi Hasfalila binti Hassan)

Portugis (1511)

- * Pada tahun 1511, Portugis menyerang dan menjajah Melaka.
- * Sultan Melaka cuba merampas kembali Melaka tetapi gagal.
- * Portugis kalah kepada Belanda pada tahun 1641.



Bangunan Stadthuys di Melaka.

(Sumber: Koleksi Dewan Bahasa dan Pustaka)

Belanda (1641)

- * Pada tahun 1641, Belanda menyerang Portugis di Melaka.
- * Belanda menang dan menjajah Melaka hingga tahun 1824.
- * Pada tahun 1824, Belanda menyerahkan Melaka kepada British melalui Perjanjian Inggeris-Belanda.



Sultan-sultan Melayu bersama-sama dengan pegawai British. (Sumber: Arkib Negara Malaysia)

British (1786, 1824, 1826 dan 1874)

- * Pada tahun 1786, British menduduki Pulau Pinang.
- * Pada tahun 1824, Melaka diserahkan kepada British oleh Belanda melalui Perjanjian Inggeris-Belanda.
- * Pada tahun 1826, British membentuk Negeri-negeri Selat yang terdiri daripada Pulau Pinang, Melaka dan Singapura.
- * Pada tahun 1874, British campur tangan di Perak dan meluaskan pengaruhnya di Tanah Melayu hingga Perang Dunia Kedua.



Cepat Jawab

Kuasa manakah yang mengalahkan Portugis di Melaka?



Apakah yang akan berlaku jika negara kita dijajah semula?



James Brooke sewaktu muda.
(Sumber: Jabatan Muzium Sarawak)

James Brooke dan Keluarga Brooke (1841)

- * James Brooke menguasai Sarawak pada tahun 1841.
- * James Brooke menggunakan gelaran "Rajah Putih".
- * Selepas kematian beliau, Sarawak terus diperintah oleh keluarga Brooke hingga tahun 1946.

Syarikat Borneo Utara British (SBUB) (1881)

- * Pada awalnya, SBUB memperoleh hak untuk mengusahakan tanah di Borneo Utara (Sabah).
- * Setelah mendapat Piagam Diraja kerajaan British, SBUB mentadbir Sabah pada tahun 1881.
- * Penjajahan SBUB berterusan hingga tahun 1946.



Tentera British menyerah kalah kepada tentera Jepun pada tahun 1942.
(Sumber: Arkib Negara Malaysia)



Lembaga Pengarah SBUB.
(Sumber: Arkib Negara Malaysia)

Jepun (1942)

- * Jepun muncul sebagai kuasa besar dan berjaya menguasai Tanah Melayu, Sarawak dan Sabah daripada British pada tahun 1942.
- * Jepun menyerah kalah kepada British pada tahun 1945.

British (1945, 1946)

- * British kembali menjajah Tanah Melayu pada tahun 1945 hingga tahun 1957.
- * Pada tahun 1946, keluarga Brooke dan SBUB menyerahkan Sarawak dan Sabah kepada British.
- * British menguasai Sarawak dan Sabah hingga tahun 1963.



Ahli Kabinet Kerajaan Persekutuan Tanah Melayu 1955.
(Sumber: Arkib Negara Malaysia)

Kedatangan kuasa asing menjejaskan kedaulatan negara kita. Oleh itu, kita sebagai rakyat perlu mempertahankan negara agar keamanan sentiasa terjamin.



TAHUKAH ANDA?

Perang Dunia Kedua bermula pada tahun 1939 dan berakhir pada tahun 1945.



AKTIVITI PAK-21

Peta Pemikiran (Thinking Map)

1. Melalui pelbagai sumber, dapatkan maklumat tentang pentingnya jati diri dalam kalangan murid.
2. Dengan menggunakan aplikasi TMK, bina peta pemikiran yang sesuai.
3. Bentangkan.

7.1.2
K7.1.5



Bimbing murid memahami kuasa asing yang campur tangan dan menjajah negara kita.



Bumi Bertuah Menjadi Rebutan

Keunikan negara kita seperti kedudukan yang strategik dan kekayaan hasil bumi serta sumber alam menyebabkan kuasa asing bersaing untuk campur tangan dan menjajah demi kepentingan mereka. Selain itu, faktor penyebaran agama, perkembangan **Revolusi Perindustrian** dan kemasyhuran mendorong minat kuasa asing terhadap negara kita.

Faktor Kedatangan Kuasa Asing

Kedudukan Strategik


- ❖ Kedudukan Melaka di laluan jalan perdagangan timur dan barat.
- ❖ Melaka muncul sebagai pelabuhan persinggahan yang penting.
- ❖ Portugis dan Belanda berminat menguasai Melaka untuk mengawal perdagangan rempah di Kepulauan Melayu.



Melaka menjadi laluan perdagangan pada abad ke-15.



Kayu balak



Emas



Sagu



Bijih timah

Kekayaan Hasil Bumi dan Sumber Alam

- ❖ Tanah Melayu mempunyai **hasil bumi** yang banyak seperti bijih timah, bijih besi dan emas.
- ❖ Sabah terkenal dengan **sumber alam** seperti kayu balak, rotan dan sarang burung.
- ❖ Sarawak pula mempunyai emas, sagu dan kapur barus.

Glosari

Hasil bumi: Hasil yang digali daripada dalam bumi.

Sumber alam: Sumber yang terdapat di permukaan bumi seperti flora dan fauna.

Revolusi Perindustrian: Pengilangan barangan secara besar-besaran.

Penyebaran Agama

- ❖ Kuasa asing mahu menyebarkan agama Kristian ke serata dunia termasuk Tanah Melayu.
- ❖ Raja Portugal menggalakkan pelayaran untuk mengembangkan agama Kristian.



Gereja St. Paul dibina pada tahun 1521 oleh Portugis di Melaka.
(Sumber: Koleksi peribadi Jayakumary a/p Marimuthu)



Perkembangan Revolusi Perindustrian di Eropah.

(Sumber: Peter Lafferty, 2002. *Perintis Sains Pengangkutan*. Kuala Lumpur: Dewan Bahasa dan Pustaka)

Revolusi Perindustrian

- ❖ Pada abad ke-18, Revolusi Perindustrian berkembang di Eropah.
- ❖ Sektor perkilangan seperti pembuatan besi dan keluli, pembuatan kereta serta mengetin makanan giat dijalankan.
- ❖ Kuasa asing memerlukan tanah jajahan untuk mendapatkan bahan mentah dan memasarkan barangan mereka.

Kemasyhuran

- ❖ Kuasa asing mahu menempa kemasyhuran untuk diri sendiri dan negara.
- ❖ Kuasa British muncul sebagai penjajah terbesar.
- ❖ James Brooke menguasai Sarawak setelah melihat kejayaan British di Pulau Pinang dan Singapura.



Fort Margherita, Sarawak.
(Sumber: Koleksi Dewan Bahasa dan Pustaka)

Penjajahan kuasa asing menyedarkan kita pentingnya kedaulatan negara dipertahankan. Sebagai rakyat, kita harus memupuk semangat patriotik supaya campur tangan dan penjajahan tidak berulang.

Nyatakan kepentingan semangat patriotik untuk mempertahankan kedaulatan negara.



Cepat Jawab

Bilakah Revolusi Perindustrian berkembang di Eropah?

7.1.3
K7.1.6



Bimbing murid mengetahui faktor-faktor kedatangan kuasa asing ke negara kita.



AKTIVITI PAK-21

Mangkuk Ikan Emas (Goldfish Bowl)

1. Bentuk lima kumpulan mengikut faktor kedatangan kuasa asing.
2. Setiap kumpulan mengumpul maklumat tambahan mengikut tajuk yang diberikan.
3. Bentangkan dapatan dan jawab soalan daripada kumpulan lain.



Kesan terhadap Pentadbiran Akibat Penjajahan

Campur tangan dan penjajahan kuasa asing telah membawa banyak perubahan dalam sistem pentadbiran di Tanah Melayu, Sarawak dan Borneo Utara (Sabah).

Negeri-negeri Selat (1826)

- ★ Pulau Pinang, Melaka dan Singapura digabungkan menjadi Negeri-negeri Selat.
- ★ Negeri-negeri ini merupakan Tanah Jajahan Mahkota.
- ★ Negeri-negeri Selat ditadbir oleh Gabenor.

Borneo Utara (Sabah) (1881)

- ★ Lembaga Pengarah SBUB di London memberikan arahan terhadap hal ehwal pentadbiran Borneo Utara.
- ★ Pentadbiran negeri diketuai oleh Gabenor.

Negeri-negeri Melayu Tidak Bersekutu (1909 dan 1914)

- ★ Kedah, Kelantan, Perlis dan Terengganu dikenali sebagai Negeri-negeri Melayu Tidak Bersekutu.
- ★ Pada tahun 1914, Johor turut dimasukkan dalam Negeri-negeri Melayu Tidak Bersekutu.
- ★ Penasihat British dilantik untuk membantu pentadbiran negeri tersebut.

Sarawak (1841)

- ★ Pemerintahan bercorak **monarki** diperkenalkan.
- ★ Pemerintah Sarawak dikenali sebagai "Rajah Putih".
- ★ Pentadbiran Sarawak dibahagikan kepada lima bahagian yang ditadbir oleh Residen.

Negeri-negeri Melayu Bersekutu (1896)

- ★ Perak, Selangor, Negeri Sembilan dan Pahang disatukan sebagai Negeri-negeri Melayu Bersekutu.
- ★ Residen British dilantik untuk mengurus pentadbiran negeri.
- ★ Residen British tidak boleh mencampuri hal ehwal agama Islam dan adat istiadat orang Melayu.

Glosari

Monarki: Pemerintahan beraja.



Cepat Jawab

Apakah corak pemerintahan di Sarawak?



TAHUKAH ANDA?

- Residen British dan Penasihat British berperanan sebagai penasihat raja atau sultan.
- Tanah Jajahan Mahkota ialah negeri yang diperintah secara langsung oleh kerajaan British.





Kesan Sosial dan Ekonomi Akibat Penjajahan

British memperkenalkan beberapa perubahan baharu yang bertujuan untuk mengeksploitasi kekayaan hasil bumi dan sumber alam. Akibat daripada perubahan tersebut, wujud beberapa kesan dari aspek ekonomi dan sosial di negara kita.

Kesan Ekonomi Akibat Penjajahan



Arang batu

Perkembangan Industri Perlombongan

Industri perlombongan giat dilakukan. Bijih timah di Tanah Melayu, emas di Sarawak dan arang batu di Sabah.

Perkembangan Pertanian Komersial

Pertanian **komersial** untuk tujuan eksport. Tanah Melayu – kelapa sawit, tebu dan kopi. Sarawak – lada hitam Sabah – tembakau



Lada hitam



Penanaman getah

Perkembangan Penanaman Getah

Banyak estet getah dibuka. Syarikat Eropah seperti Guthrie dan British North Borneo Company terlibat dalam sektor penanaman getah.

Sistem Perbankan Modern

Sistem perbankan diperkenalkan. Bank seperti Mercantile Bank (1859) dan The Chartered Bank (1888) ditubuhkan.



Mercantile Bank di Ipoh.



Cepat Jawab

Nyatakan pertanian komersial yang diusahakan di Sabah.

Glosari

Komersial: Berkaitan dengan perdagangan.

Kesan Sosial Akibat Penjajahan

Pembentukan Masyarakat Majmuk

Kemasukan tenaga kerja dari negara China dan India mewujudkan masyarakat majmuk.



Pekerja Cina dan India.
(Sumber: Arkib Negara Malaysia)



Sibu pada tahun 1960-an.
(Sumber: Sarawak Chinese Cultural Association, 2010. *Sibu of Yesterday*. Edisi Kedua. Sibu: Sarawak)

Perkembangan Bandar Baharu

Bandar baharu muncul sebagai pusat pentadbiran, perdagangan dan pelabuhan.

Contohnya, Kuala Lumpur, Ipoh, Taiping, Seremban, Sibu, Miri, Jesselton (Kota Kinabalu), Sandakan dan Tawau.

Perkembangan Sistem Pendidikan

Sistem pendidikan **vernakular** mengikut aliran bahasa Melayu, Cina dan Tamil diperkenalkan.

Sekolah Inggeris diwujudkan di kawasan pekan dan bandar.

Pendidikan pada peringkat maktab untuk melatih bakal guru diperkenalkan.



SK St. Mary Bandar ditubuhkan pada tahun 1883 (sekolah Inggeris pertama di Sabah).
(Sumber: SK St. Mary Bandar, Sabah)

Perkembangan Sistem Pengangkutan dan Perhubungan

Jalan kereta api dan jalan raya dibina untuk memudahkan hasil dihantar ke pelabuhan.

Sistem pos, telegraf dan telefon diperkenalkan.



Stesen kereta api Kuala Lumpur pada tahun 1886.
(Sumber: Arkib Negara Malaysia)

Perkembangan Perkhidmatan Kesihatan

Pembukaan hospital dan **dispensari** untuk merawat pesakit.



Hospital Taiping ditubuhkan pada tahun 1880 (hospital pertama di negara kita).
(Sumber: Arkib Negara Malaysia)

Apakah kepentingan mengekalkan kedaulatan dan kemakmuran negara?

Eksplotasi sumber bahan mentah oleh penjajah menyedarkan kita betapa pentingnya kedaulatan dan kemakmuran negara dipelihara. Kita perlu tahu bahawa segala kesan pentadbiran, sosial dan ekonomi yang wujud adalah untuk kepentingan pihak penjajah semata-mata.

Glosari

Dispensari: Tempat mengambil ubat.

Eksplotasi: Mengambil kesempatan terhadap sesuatu untuk keuntungan sendiri.

Vernakular: Penggunaan bahasa ibunda sebagai bahasa pengantar.



Kuasa Asing di Tanah Airku

Kuasa asing menggunakan strategi seperti naungan, campur tangan dan penjajahan untuk mencampuri hal ehwal negara.

Campur Tangan dan Penjajahan Kuasa Asing

Siam, Portugis, Belanda, British, Jepun, keluarga Brooke dan Syarikat Borneo Utara British ialah kuasa asing yang campur tangan dan menjajah negara kita.



Bumi Bertuah Menjadi Rebutan

Kedudukan strategik, kekayaan hasil bumi dan sumber alam, penyebaran agama, Revolusi Perindustrian dan kemasyhuran merupakan faktor utama negara kita dijajah.



Penjajahan dan Kesannya

Kesan Pentadbiran:

- Negeri-negeri Selat (1826)
- Sarawak (1841)
- Borneo Utara (Sabah) (1881)
- Negeri-negeri Melayu Bersekutu (1896)
- Negeri-negeri Melayu Tidak Bersekutu (1909 dan 1914)

Kesan Ekonomi:

- Perkembangan Penanaman Getah
- Perkembangan Industri Perlombongan
- Perkembangan Pertanian Komersial
- Sistem Perbankan Modern

Kesan Sosial:

- Pembentukan Masyarakat Majmuk
- Perkembangan Bandar Baharu
- Perkembangan Sistem Pendidikan
- Perkembangan Perkhidmatan Kesihatan
- Perkembangan Sistem Pengangkutan dan Perhubungan



Unit ini membincangkan campur tangan dan penjajahan di negara kita. Pengetahuan tentang kuasa asing membantu kita untuk mengenali tokoh pejuang tempatan yang bangun menentang penjajah pada unit yang berikutnya.

Isi tempat kosong bagi setiap soalan di bawah berpandukan jawapan yang diberikan.

komersial

Melaka

naungan

Jepun

pelabuhan

majmuk

Perindustrian

Rajah Putih

dispensari

Kekayaan

- 1 Maksud negeri _____ ialah negeri yang diberi perlindungan oleh kuasa asing.
- 2 Pada Perang Dunia Kedua, kuasa _____ berjaya menduduki negara kita.
- 3 Pulau Pinang, _____ dan Singapura digabungkan menjadi Negeri-negeri Selat pada tahun 1826.
- 4 Revolusi _____ merupakan salah satu faktor yang menyebabkan kuasa asing campur tangan dan menjajah negara kita.
- 5 British memperkenalkan pertanian _____ untuk tujuan eksport.
- 6 Kedatangan pekerja Cina dan India telah membentuk masyarakat _____.
- 7 Hospital dan _____ dibuka untuk merawat pesakit.
- 8 _____ hasil bumi dan sumber alam adalah antara faktor kedatangan kuasa asing ke negara kita.
- 9 James Brooke menggunakan gelaran _____ selepas menguasai Sarawak.
- 10 Jalan kereta api dan jalan raya dibina untuk menghantar hasil ke _____.



Mengetahui zaman penjajahan membolehkan kita memahami dan menghargai kedaulatan negara pada masa ini.

Dahulu dan Kini

Kerajaan British menjadikan Jesselton sebagai ibu negeri Borneo Utara. Pada tahun 1968, namanya ditukar kepada Kota Kinabalu.



Bandar Jesselton pada tahun 1910.
(Sumber: Arkib Negara Malaysia)



Bandar Kota Kinabalu.
(Sumber: Tourism Malaysia)

Diri

Sebagai pelajar, kita harus mempunyai perasaan cinta akan negara.

Masyarakat

Perasaan cinta akan negara dapat melahirkan masyarakat yang mempunyai semangat patriotik.

Negara

Warganegara yang memiliki jati diri dan semangat patriotik mampu mempertahankan kedaulatan negara.